



**Sud Bosne i Hercegovine**  
**Суд Босне и Херцеговине**

---

Broj: S1 3 IŽ 043711 22 IŽ  
Sarajevo, 18.08.2022. godine

Sud Bosne i Hercegovine, u vijeću Apelacionog odjeljenja sastavljenom od sudija Zvezdane Antonović, kao predsjednika vijeća, Dinke Bešlagić-Čovrk i Vesne Trifunović, kao članova vijeća, odlučujući o žalbi Fatime Hadžić, Nj., ..., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine, u nejavnoj sjednici, održanoj dana 18.08.2022. godine, donio je

**R J E Š E N J E**

**Žalba se odbija.**

**O b r a z l o ž e n j e**

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što je uz prijavu nije dostavila validan dokaz o prebivalištu.

Žaliteljica je protiv navedene odluke blagovremeno izjavila žalbu navodeći da je uredno podnijela zahtjev.

Centralna izborna komisija Bosne i Hercegovine u odgovoru na žalbu navodi da uz prijavu nisu dostavljeni svi potrebni dokumenti koji se odnose na validan dokaz o tačnoj adresi u inostranstvu, zbog čega predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje izvan BiH dostavljene dana 18.07.2022. godine, elektronskim putem u skladu sa Uputstvom o postupku slanja, prijema, obrade, arhiviranja i zaštite elektronskih prijava državljana Bosne i Hercegovine za

glasanje izvan BiH elektronskim putem („Službeni glasnik BiH“ broj:27/22) pravilno uočila da podnositeljica žalbe uz prijavni obrazac priložila pasoš Bosne i Hercegovine i identifikacioni dokument koji je istekao 07.05.1992. godine, a nije dostavila validan dokaz o prebivalištu.

Postupajući na način opisan u prednje utvrđenom činjeničnom stanju, podnositeljica žalbe je postupila suprotno odredbi člana 3.15 stav (3) Izbornog zakona BiH („Službeni glasnik BiH“, broj 23/01 do 51/22), kojom je propisano da izbjeglo lice iz BiH koje se ne nalazi u Centralnom biračkom spisku, da bi bilo upisano u Centralni birački spisak, i time ostvarilo biračko pravo u skladu sa Zakonom, dužno je podnijeti prijavu Centralnoj izbornoj komisiji BiH. Uz popunjenu i potpisanu prijavu podnositeljica prilaže i dokaz o identitetu, dokaz o državljanstvu BiH, dokaz o promjeni prebivališta u Bosni i Hercegovini u skladu sa članom 20.8 Izbornog zakona BiH i podatke o tačnoj adresi u inostranstvu.

U konkretnom slučaju žaliteljica uz prijavu nije dostavila sve potrebne i propisane podatke, obzirom da nije dostavila validan dokaz o prebivalištu (kopija lične karte izdate prije 1991 godine ili da se nalazi na popisu stanovništva iz 1991. godine).

Napomene radi, žaliteljici nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

Predsjednik Vijeća  
Sudija  
Zvezdana Antonović